



### **Signalisaziun nouva parkegis pel parc naziunal lung la via dal Pass dal Fuorn**

Las piazzas da parcar aint il parc naziunal Svizzer PNS lung la via dal Pass dal Fuorn nu correspuondan a las pretaisas da sgürezza. Problematic esa impustüt cur cha gruppas, p. ex. classas da scoula, traversan la via. Perquai s'ha d'ürant la stà 2016 realisà sco prova diversas masüras da prevenziun pro quistas piazzas da parcar. Per amegljar la situaziun ha il PNS laschà elavurar ün proget chi prevezza da schoglier duos piazzas da parcar, d'ingrondir e da sanar piazzas sco eir da signalisar definitiv ün limita da sveltezza da 60 km/h pro las piazzas da parcar chi restan. Il Cumün da Zernez, chi'd es respunsabel pel trafic plan, vess da surtour la mità dals cuosts. La dumonda da credit vain preschantada a la radunanza cumünala da preventiv principi december.

### **Edifizi da gestiun Cul – büro per las gestiuns tecnicas**

Insembl cul nouv manader da las gestiuns tecnicas prevezza il cumün da concentrar in avegnir tuot la part tecnica inclus l'uffizi da fabrica al medem lö. Perquai faja dabsögn d'ün büro implü chi gniss realisà aint il local da reserva da l'edifizi da gestiun in Cul. Resalv la decisiun da la radunanza cumünala da preventiv sun las lavurs gnüdas surdattas seguaintamaing: lavurs d'impressari a Foffa + Conrad SA, Zernez; fanestras e lavurs da montascha in lain a Foffa Conrad Holzbau AG, Zernez; lavurs da lovafoonds a Lothar Camichel, Zuoz; lavurs da pittur a Josin Neuhäusler, Susch; installaziuns electricas a Electra Buin, Scuol e l'installaziun dal s-chodamaint a Tung SA, Zernez.

### **Center da Sport – rimplazzamaint manisaziun da la tecnica da glatsch**

Per müdar oura la manisaziun da la tecnica da la plazza da glatsch ha la suprastanza cumünala deliberà il credit necessari e surdat l'incumbenza a la firma Walter Wettstein AG a Gümligen.

### **Preproget per la fabrica da las vias da god Güstizia fin Zernez e Munt Baselgia**

La radunanza cumünala da preventiv 2015 vaiva approvà ün credit da 2.5 milliuns francs per la sanaziun da las vias da god Munt Baselgia e Güstizia fin Zernez. D'ürant il 2016 ha l'uffizi da god e privel da la natüra elavurà in incumbenza dal cumün ün preproget per quistas sanaziuns. Lapro s'ha stuvü constatar cha'ls imports chi d'eiran gnüts deliberats per las sanaziuns da quistas duos vias nu bastan. La suprastanza cumünala ha sün quai decis da propuoner a la radunanza cumünala da preventiv 2016 da schoglier il credit stat concess per la sanaziun da la via Munt Baselgia e da conceder ün credit nouv per la sanaziun da la via da god tanter Güstizia e Gondas. Quista sanaziun gniss fatta insembl cun l'interramaint dal cabel da forz'electrica tras las Ouvras Electricas d'Engadina d'ürant il 2017.

### **Punt Ota Brail – sanaziun provedimaint d'aua e nouv'ouvra electrica**

La lingia da pressiun tanter l'inchaschamaint d'aua da baiver e'l reservuar illa Val Punt Ota a Brail es in ün stadi fich nosch. In connex cul proget da sanaziun s'ha laschà calcular ils cuosts per integrar i'l reservuar existent ün turbina per prodüer forz'electric. Il preventiv finanziel muossess oura ün guadogn. Per na surchargiar però amo plü ferm il preventiv d'investiziuns 2017 ha la suprastanza decis da metter inavo il proget sül 2018.

### **Garanzia da deficit per La Diagonela 2017**

La suprastanza ha acconsenti a la dumonda dal comité d'organisaziun per ün garanzia da deficit per La Diagonela 2017. Quista cuorsa da passlung ha lö als 21 schner 2017 i'ls contuorns da Zuoz. L'acconsentimaint vala resalv la decisiun da la radunanza cumünala da preventiv 2016.

### **Dumonda per ün sustegn finanziel pel 1. open air da schlagher a Zernez**

Als 17 gün 2017 ha lö a Zernez il prüm open air da schlagher. L'organisatura, la società „Engadin Event“, ha dumandà al Cumün da Zernez per ün sustegn finanziel. Cun diversas pretaisas e resalv l'acconsentimaint da la radunanza cumünala da preventiv ha la suprastanza concess ün sustegn finanziel e sustegn in fuorma d'agüd dals lavuraints cumünals.

### **Provedimaint electric in Sosa –drets da passagi**

In connex culla fabrica da la staziun da transfuormaziun Sosa s'ha stuvü abinar cun trais proprietaris da terrain drets da passagi per las bavroulas dal provedimaint electric. Ils trais contrats sun gnüts approvats.

### **Sanaziun tunnel Viefier Retica Sasslatsch I, Susch – surtutta d'ün cuntschet**

Per sanar il tunnel Sasslatsch I ha la Viefier Retica eret tanter oter ün cuntschet temporari. Las lavurs sun intant terminadas ed il geolog ha propuonü da laschar il cuntschet. Suot singulas cundiziuns s'ha il cumün declerà pront da surtour quist cuntschet ed da til mantgnair in avegnir.